

司

農

奏

議

司農奏議卷之七

太子少保戶部尚書

潘初梓

覆保定巡撫議賑疏

題爲三報異常水災懇乞

天恩亟賜破格賑救以安

畿甸事福建清吏司案呈奉本部送戶科抄出巡撫保定右副都御史孫瑋題前事等因奉

聖旨該部知道欽此欽遵抄出到部送司看得截留漕粟暫借津糧事宜係雲南司掌行該本司付

准回稱歲漕四百萬石轉輸

京師三軍仰給屢經本部題

准以後漕粟不得輕請賑濟况今南船抵灣者十

不及一義之靈雨傾駭腐糧幾二十萬尚難湊

補天津歲派漕粟六萬石俱係年收年放僅足

支給天津河間等管軍士並無餘剩等因呈堂

回付前來及查先據保定府冊報本府并所屬

州縣實在倉糧一十一萬七千六百一十餘石

庫銀五萬五千九百八十餘兩銅錢五萬一千

五百八十有奇河開府冊報本府并所屬州縣
實在倉糧六萬七千六百四十餘石庫銀六萬
一千五百餘兩銅錢五萬六千六百九十七文
今該前因查呈到部爲照畿南靈雨爲災河漲
水溢以致稼穫之地俱假舟航廬舍之塲從爲
蘆荻棲身無地餬口何資溝壑堪憐萑苻可慮
撫臣蒿目棘心連疏奏報請發惓惓意良苦矣
但漕粟四百萬石三軍實繫命焉往時留賑中
州發糴 畿輔猶恃倉庾稍稍充裕今昔頓殊

盈誦大異且近奉

特旨并本部議留漕糧十六萬石以作淮陽二府穀種及河工支用京儲軍餉方匱竭是憂安能復借郡縣資賑卹乎至天津倉糧六萬石又係時收時放僅供天津各營軍士既無積剩似難那移惟是撫按贓罰雖亦濟邊之需

大工之助無敢輕議而當此萬難設處之時權宜留賑稍覺可從再照各府州縣本地災侵合當於本處倉庫通融區畫况積原爲救荒庫剩正

堪那處 畿南六府均係撫屬之邦保河地當
窪下荒歉無時今查所積尚有倉糧一十八萬
五千二百餘石庫銀一十一萬七千四百餘兩
銅錢十萬八千二百餘文在真順廣大每多逢
年更當數倍與其截漕那餉孰若先支本處倉
庫繼移鄰府積聚之爲便也旣經具題前來相
應覆 請恭候

命下臣等咨行撫按屯田衙門將先後報到災傷速
爲查勘明實所屬六府預備社義等倉積穀并

庫貯堪動銀錢備行刷出通融給散凡有災去處分別災傷輕重極次貧丁先儘本地倉庫廣行救濟或煮粥或放賑俱聽便宜行事本倉庫不足則取給於各府再不足方留撫按贓罰濟用有司均宜悉心體

國通利恤鄰如有秦越鄰封藉虛名塞責民無實惠者撫按各官指名叅以憑本部覆

請重處事完仍將查刷過各倉庫銀錢糧石數目并賑救過極次貧丁事宜造冊

奏繳青冊送部查考伏乞

聖明裁定

勅下遵行等因萬曆三十二年八月二十七日具題
九月初一日奉

聖旨是畿南災祲異常朕心憫惻便行與撫按屯田
衙門作速查勘明實開報以憑賑濟你部裏旣說
漕糧必不可動着於所屬六府預備社義等倉積
穀并庫貯堪動銀錢盡行刷出分別給散本倉庫
不足取給鄰府再不足方留贓罰銀兩濟用有司

均宜悉心體國稱朕愛養元元之意勿得自分彼此致取罪譴欽此

題順天等府荒政疏

題爲內地重菑拯救宜急敬陳一二末議以佐荒
政以保子遺事臣辦事署中屢接順天等處巡
撫劉四科等迭到各府災傷文揭覽不終牘淚
輒交頤以爲古來災變有矣何至如今日之危
四方水旱多矣何至如三輔之慘也漢臣有言
腹饑不得食膚寒不得衣雖慈父不能保其子
君安得有其民 畿輔何地內切
宸居外邇邊徼有如民窮盜起猝難撲滅惡之適爲

夷虜驅而貽蕭牆患且非所以觀天下也卽不
然而聽其轉徙四方必且爲道殣必且爲溝瘠
祖宗數百年來培養調何而一旦捐之豈可不爲傷
心哉臣竊調修救雖無奇策而泄泄坐視惡在
其爲民父母也爲此襲迹前人條議數事恭請
聖明裁斷如果一得可採 勅下臣部轉咨撫按次
第修舉不獨厚下實亦安宅也伏惟

聖慈垂聽亟賜施行 畿輔幸甚臣愚幸甚等因萬

曆三十二年九月二十二日具題

一曰減徭賦益財生於地力因于民維今數郡地
變滄桑而民空皮骨矣責以全徵祇迫之死徙
所有京邊起運軍

國重需誠萬萬不容已其他存留諸項雖按事爲
科因人授食亦自難免而當損之時二簋用享
獨無浮可節冗可汰一時可暫紓者乎至遠年
積逋卽今督之必不能輸何如蠲之聊以見德
是在各撫按率屬嚴查被災分數核實具申酌
議某項應裁裁之俟年豐而後復額某項應停

停之俟民裕而後補徵某頂帶徵應罷罷之寧
不足乎

國而毋寧不堪其民時或已徵在官支解如故或
尚未輸官而已入里胥之手卽抵本名見徵正
供毋令寅緣乾沒以茲用一緩二姑示不得已
之心儻亦恤患扶傷所爲寬一分之政也

一曰發倉廩益凡府州縣各有預備倉義倉社倉
本以儲穀待賑

詔旨部劄不啻屢申而各處給繇冊取亦多至盈額

顧虛實未可知耳宜行各該撫按嚴檄有司查
驗實數分別貧民計口賑給有差然賑給止據
在冊之下丁而人丁漏報往往十九一人得穀
九人向隅不勝萃矣卽在冊下丁亦未必孑然
無父母兄弟妻子受穀苦少聚食苦多猶然殍
矣計惟有煮粥一法事若煩瑣惠實曾施是在
良有司酌時地之宜務均調之實擇人而使峻
法以行且不難躬親督視焉嘗見一下令開倉
而猾里奸胥視爲可居之奇貨雖設場施粥而

遲遺侵冒不稱當厄之壺殮救死謂何虛應乃
爾卽 京師餒廠歲費

國儲餒者未必貧貧者未必餒可痛恨矣精求其
法而力除其蠹此于災民不無補焉

一曰勸施濟益燕趙古稱多慷慨節俠之士今其
民雖困詘乎而豪門士族富商大賈擁素封負
高貴者亦在在有之令行撫按以及有司多方
諭意以禮勸分其銀錢粟麥多寡無論或捐輸
千官或資給其里或減息以貸或輕價以糶又

或隨便村集立廠煮糜別作一方擅施里甲操
實登報有司差等奏

開計所捐助最多者准照開納事例遙授應得職銜
或特建牌坊用旌不朽次之榮以冠帶又次之
扁其門復其身將使富而好行其德者競勤于
市義之風貧而幸有所依者全活于敦仁之俗
矣但必出自民願毋得強以官司此則以地方
救地方其于資予更當霑溉更實也

一曰廣平糶益民所重惟食耳前奉

明旨撥運通糧十萬抵給軍匠月糧誠慮

京師米貴藉以平價甚

盛恩也顧五方聚居衆稱萬億軍匠而外周暨實難
目今斗米價已一錢則冬春可知在外郡抑又
可知向者江南河南重災請

占通糴遇有客商糴買雜糧運赴災地各從民便不
許禁約攔阻違者撫按官叅治今宜申諭遵行
懸示商民聽其有貨願糴者特給執照隨便告
糴運就災地發糴關津不得推稅官司不得侵

擾其糴穀凌折不得閉遏把持又或于府州縣量留各院贓罰吏承貼班缺官柴馬一切商稅等銀暫免解京分委廉能佐領敦實富民于附近豐收地方糴買雜糧前來定價出糶而以所糴之銀仍補前項應解京邊額數則境內之穀多而價自平民間之食足而心自定耳

一曰酌開納蓋

國家歲開例納凡以佐軍

國而濟時艱况輸粟爲名原無擇于本折要在主

計者酌時盈縮而通融調劑之往年山東河南
饑饉題將本部見行開納事例出榜曉諭被災
各府州縣有願納者自本年冬起至來年秋止
俱許于本州縣上納不拘米穀雜糧照事例銀
數依時估折願納銀者亦卽本處交收取倉庫
實收給領劄付類報部院查考前項銀穀但備
發賑不作別支于時不無裨補以今災地正可
依行省其往返之費而樂輸者自多賴有接濟
之資而賑施者不匱矣

一曰興工作蓋力役惟民使安坐而糜餼廩教之
惰矣時日良多使終歲而仰公家惠不繼矣計
今

邦畿千里城垣廨舍堤壩橋梁所在皆傾所在宜
葺勢且必用民力而被災諸民除老穉病廢外
其他少壯精強所堪任畚鍤司版築肩木石者
固自多也當田工未起之時正待哺方殷之日
謂宜隨地營修鳩民力作無論土著流移一切
募之稱事而受餐因工以寓助一以資繕治一

以省賑施一以習勤勞一以示安插四善具矣
乃若工費聽撫按有司曲計而預圖之或奏

請動支或便宜行事此在昔范仲淹之于浙西蘇軾
之于杭州率用此法而今可倣行者也

一曰嚴禁諭蓋振廩受餐鳩工通糴鄉城市集民
多類聚而群居矣聚則紛群則亂或挾以必哀
之情或傲以烏合之衆敢于誅凌公然搶奪暗
事穿窬明行劫掠勢所必至蔓乃難圖太

國家所惜帑民耳豈其亂民是庇宜令有司嚴諭

于先重繩于後必無以姑息案奸宄也其它偶
有賢爭寧爲諭解毋輕受理省刑息訟儻幾幸
于市不驚塵野無吠犬受賜多矣乃若麴蘖耗
財飲賭廢事平時尤當厲禁災地何堪濫觴調
宜力罷酒酤漏革場肆卽不能如漢法罰金以
時賜酺而去泰去甚或亦塞之乎涓涓焉且試
觀

京師酒壚鱗次優伎肩摩所在糟丘終朝舞榭對
茲饑饉何忍何安柰何不能一挽江河風示草

莽哉竊又以爲欲禁侈民先自四民之首始

一曰課守令蓋聞無治法有治人遙度而預圖自
不若審時以制變如越中旱荒諸州禁增米價
矣趙清獻獨增之而商旅湊集民賴生全兩浙
大饑范文正乃縱民競渡繁興土木日役千人
意在發有餘濟不足也而民無流亾所活數萬
緡斯以觀法何常乎親民親事通變善調惟賢
守令是望且晉饑秦汎之舟魯糴齊歸之玉以
今率土王土蔡人吾人何分彼此彼如流而歸

我自宜視以同仁或安插有方或拯救得法以
視恤災本境者尤循良異等也顧鸞鳳與鷹鷂
異性珎珠與璠璣殊品不鼓則不興不厲則不
勸宜行各該撫按特于賑困招流加意體察專
立舉刺之科不在尋常之格果實心實政全活
良多則隨時奏

聞超權示異其或有空文塞責而漫不經心者有虛
糜廩餼而民無實惠者有徒抱憂時之慮而展
布不前者有反存不肖之心而因緣爲利者與

夫隣府州縣分畛于土流弛擔于胡越或逐之
出疆或立視其死者一體查案重處庶幾吏議
嚴而人心奮從前荒政實見施行災民其有慘
乎統候

請 欽恤餘銀分賑饑民疏

題爲欽奉 聖諭事臣前奉

聖諭領出太僕寺馬價銀十萬兩分給都下災民及
煤窯窮戶等項業已散過二萬七千九百八十
五兩八錢尚剩七萬二千一十四兩二錢具本
另題外伏思

聖諭內有舊例該舉行的着題來行此

皇上無已之恩正臣等將順之日也因念今歲水患
不獨都城繇都城以及郊圻千里如洗而順永

保河之間更爲慘惡目今秋盡冬來猶然道路
成河行者以筏則不惟秋成已置抑且春種難
期至于房屋坍塌人畜宛傷較之都民室戶不
啻什百傷哉此民何獨不居

輦轂之前棄在濡沫之外哉每接順保撫臣劉四科
等報災文揭或懇發

內帑或議留漕糧發帑出自

聖恩臣不敢請京儲匱調已甚臣不敢言惟是
欽賞剩銀七萬二千一十餘兩已出之問金原爲

卹無方之

德意正可普施合無分發順保兩巡撫地方各三萬
兩聽彼撫按隨宜救助或卽以銀分給貧民或
另行委官糴穀散賑尚餘一萬二千餘兩暫留
來春別項存恤皆

皇上浩蕩之至仁也往者河南荐饑

皇上特捐三十萬金

遣官往賑今茲各府災更重于中州郡復切于內地
聖諭所謂舊例該行者宜無越此不然股肱之郡不

甚異于

闕下之民而溝壑之遺顧獨格于墜餘之賜也
皇上于斯亦必有大不忍者存矣伏惟

聖明垂察如果臣言可採

勅下臣部各行撫按衙門遵照施行三輔幸甚等因
萬曆三十二年九月二十九日具題

原缺

子女相携知難兼養投而棄之水中者呼號相
抱匍匐難前塞耳恐行不遑掉顧死生之際豈
獲已乎方方皆水無可逃生處處皆貧何從丐
食草根榆葉盡從漂泊之餘棄背殘骸尚在覆
垣之下此近日之景象也其幸存百一之民止
賴販負相周少紓雀鼠之息彼一人所負能給
幾朝一車所載能濟幾人而津會之處一步一
闌在在索錢有如負債以致移民移粟困于畏
途交易往來憚于荆棘弱者就斃強者生心其

就斃者

皇上之赤子也臣則何忍其生心者 國家之隱憂也臣則何安邇聞都門咫尺卽有禦人而奪其馬匹衣服者矣臣職掌民曹民之危苦臣職之溺也非不議蠲而皮之不存毛將安附非不議賑而一杯之水安救車薪只此販負一節尤民命所係第一關頭用是不避煩言略爲模寫然臣所陳止民隱耳至于拯而救之則在

皇上伏乞

推念都城者以及畿甸推恤密戶者以

及圻民將前 欽發賑饑僕寺所餘銀兩允臣
前疏分給順保二撫臣令之多方救濟販負相
周嚴論道途姑免征權則

聖政一新甦回萬命太平根本實在于茲凡此

破格殊恩 如天大德自有

宸斷臣不敢與亦未敢輕言也統惟

聖明斟酌

勅下施行臣不勝惶悚待

命之至等因萬曆三十二年閏九月二十六日具題

請發救荒章奏疏

題爲饑民日聚日危荒政愈遲愈急懇乞

聖慈軫念速發諸疏以救顛連以遏亂萌事照得今
歲雨水之災百年希有目前饑荒之景逐日有
加所賴者

皇上之德音所據者撫按之奏報臺省之條議而
所奉揚者臣部之覆請耳乃人人候

旨疏疏留中臣等極知

皇上聖智仁慈恩繇獨斷但一切啼饑號寒之聲

裸體菜色之狀有難以時刻緩者臣謹不避瑣
瀆再爲陳之夫 都門亦災地也各郡饑民所以紛
然投集者無非謂天不我愛地不我養父母妻
子不我保聚惟是倚

皇上爲天地爲父母耳有如

皇上更不之卹彼皁皁者復可望焉目今景物蕭條
市價翔踴米無可糴食無可丐試觀騎桑之餓
滿途而風雪之寒侵骨何怪乎五城每日報到
死者之多也此誰非

皇上之赤子也可念也又何怪乎 京城內外劫馬
殺人而椎埋胠篋無虛日也此誰非

皇上之良民也可慮也繇今以至麥秋尚須半載以
此情景度之勢豈能待一夫狐鳴擾鋤嚮應私
掠不已漸及公家 天象明示警於燕分
祖陵不虛變於前日此誰非

皇上之隱憂也可畏也臣竊見邇來告變諸疏隨時
蒙 答夫然後樞臣得以措手兵機可以無遲
乃今畿民一日不食則饑三日不食則死呼吸

異形亂萌已見其情其急何減兵機况

京畿何地陟步卽爲

宸居指顧卽爲

陵寢臣以爲目前之事更無切于此者寢食靡寧仰

天額訴乞哉

皇上特念根本重地萬分不可動搖溝壑餘生一刻
不可坐視

亟簡臣部併臺省撫按諸疏盡

賜批發應議覆者議覆應徑行者徑行或分賑於諸

三才圖會卷之二十一
州而蟻聚之饑民自散或厚施於

輦轂而逢涌之物價自平片言

渙發卽屬深仁當厄施發尤易見德其今日不卽死
徙之民皆他日感 恩圖報

皇上出賦稅捍疆圉之民也所關治亂安危匪渺小
矣惟

皇上急圖之臣愚不勝懇禱等因萬曆三十二年十
月十三日具題

災異脩省疏

奏爲怪徵異變層見叠形謹涕泣額陳恪脩職禁
懇祈 聖明猛加省圖直拔禍本以救目前危
亂事臣昨接太常寺少卿桂有根揭稱

天壇雷火擊毀望杆旬日間三奏 明旨一則云省
躬思咎一則云旦夕靡寧一則云關係朕躬朕
知道了又以各修職責之諸臣除臣紫率屬痛
加修省外餘而思思而懼不覺其涕之無從也
夫

皇上一聞災稷卽誓修省此不可不謂敬天之誠而臣又何有過求哉亦以頻年省修之誓耳聞已熟而軌轍如故上天災異之示有加無已而莫知其終臣是以思而懼懼而不知其涕之無從也嘗稽從古天災史不絕書然不過日食星孛旱乾水溢而止耳此但可謂之災而不可謂之異惟大 山陵寢廟命脉發源水大風雷次第見告至 郊壇望杆之毀而變也極矣而者謂其希覲罕聞始共驚之曰異臣愚以爲此猶未

甚異也夫天下有非常之禍必先有非常之徵
天下有非常之徵必先有非常之感則祿權之
害所謂 國家之禍本爲域中第一可驚可異
者是已請得而畢其說焉蓋聖非堯舜安能每
事盡善則一政之弗協一令之不順或亦人主
之常而未可盡非也第未聞有家與爲讐人與
爲怨舉曾天率土共罹荼毒而漠然不爲置念
者

皇上試清夜平心以思之異耶不異耶天聽至高安

能群情畢達則一時之執拗一人之齟齬或亦人主之常而未可盡非也第未聞有數年苦諫通國力爭舉大小臣工共虞危亾而恬然獨利其菑者

皇上試清夜平心以思之異耶不異耶刻印銷印安能拘小信之硜硜則一言之寒盟一諾之反汗或亦人主之常而未可盡非也第未聞有形諸繇綸布諸中外舉皇天后土共聞此言而惟遷就以姑待明日者

皇上試清夜平心以思之異耶不異耶一日萬幾安
能親庶務之瑣瑣則一念之倦勤一事之委煩
或亦人主之常而未可盡非也第未聞有此因
之激章疏槩不下缺官槩不補滯獄槩不釋

朝講 郊廟槩不親諸凡幾務槩從廢格而惟堅持
以求勝其多口者

皇上試清夜平心以思之異耶不異耶之數者當其
始之嘗試也未嘗不自駭其異及其久而積玩
也不覺遂習以爲常迨至今日無不可試竟無

不可玩無不可玩竟無不可爲常惟夫舉天地古今所共驚共駭而視爲故常乃其所爲非常大可異者也異以招異則怪徵異變又何必訝其層見而疊形哉且是異也不于山川陵谷而在于園丘之望杆天之意若曰鄉日之僻遠隱幽或以爲無徵而不信是咫尺者庶幾耳而目之矣况杆以望名固郊畿內外所共瞻望也連年稅政日聞而高高在上者顧默不能啓災不能懼禁已大失下土萬民之望其又何愛焉而

不一折毀其標之也吁以此思異異可知矣異
非譴告仁愛之虛稱直闢理亂安危之大故惜
也先後進憂危之詞者其幸而多言不申得保
祿位以至于今其亦不幸不一小驗重稔禍敗
以貽之後則爲目前之計尚可徒事脩省之縟
儀祭告之靡文已耶謂宜申明

舊旨首議罷停急脫民于湯火之中然後將數十闕
政旦夕設誠而舉行焉夫此所舉行者非甚高
難行之事皆

皇上萬曆初年所已試之良法也萬曆之初卽

皇上之常

皇上能復當年之常法而無可驚可異以駭域中將
見上天亦復協氣之常應而無可驚可異以駭
闕下矣如此而後禍本拔如此而後亂萌銷如此
而後萬靈嬉國祚永不然者徒事虛文罔裨實
政則赫赫明威其爲所侮玩也屢矣豈其再三
譴告不厭煩數而終無如

皇上何哉臣民部也司民言民故感激異變恭修職

崇輒以生民利病泣請焉時迫矣伏惟

聖明猛省而急圖之臣無任悚慄待

命之至等因萬曆三十三年六月初七日具奏

題保定巡撫災傷疏

題爲畿民苦困未獲復甦水蝗異災懇乞

速賜勘救以拯予遺以安重地事福建清吏司案呈
奉本部送戶科抄出巡撫保定等府提督紫荆
等關兼理海防軍務都察院右副都御史孫瑋
題前事等因奉

聖旨近畿根本之地連年荒歉今又災傷可慮之甚
戶部上緊看議來說欽此抄出到部送司案查近
該保定巡撫孫瑋揭爲重地復罹異常雹蝗水

災人心洶洶事勢可虞亟應奏報事內開祁州
靜海等一十四州縣各罹重大災傷及續報交
河滄州等三十二州縣衛所俱經據揭併勘去
訖案呈到部爲照

畿輔之于

輦轂誼切股肱勢聯車輔故呼吸共其休戚痾瘥
尤切撫摩其體重也自客歲霍露示災人情洶
懼仰賴

皇仁噓植自冬徂春救死扶傷甫還喘息乃不意天

未悔禍而海災叠稜有如保定巡撫所揭報者
也雨雹則猛于推擊洪流則埒彼懷襄室廬鱗
櫛一歸魚鱉之鄉禾黍高低盡飽螟蝗之腹千
家哭野萬井銷煙騰報至一月連章罹災幾四
十餘處臣等俯痛蒸黎仰籌租入有徬徨躑躅
而不敢自寧者隨以 畿輔重地水蝗異災候
旨經旬卽行轉勘乃茲恭捧 綸音特垂憫卹令臣
部上緊看議來說此卽如傷之視其咨之嘆何
以加諸臣民部也民隱未徹猶當 上聞况

德意勤拳而不思爲仰承計乎大約救荒之策不越
蠲賑兩端蠲則如疏開起存錢糧酌量蠲緩此
係重災所當破格優恤者也賑則如疏開議留
贓罰等銀預糴待賑此卽稍災亦當設誠致行
者也然一郡之中災有多寡一邑之內災有重
輕今歲去歲不無異同水潦蝗蝻不無差別此
非體勘的實而後拯濟從之烏能使人無隱情
而民沾實惠也旣經奉有

特旨合無容臣部轉行各巡按御史令其速爲勘報

原缺

水災疏

題爲異常水患傷稼損漕直達

宸聰亟圖修救事竊見閏六月以來淫淋彌月黯黯連朝至二十四日暴雨建瓴積潦罷市而本月初五初六傾注加甚晝夜不休毀屋頽垣傷人漂畜官廨滙爲大澤馳道渺若洪河目擊心憂正思塵聽復接鎮江等十三衛所運官李自新等報稱洪水驟發漂流糧船二十三隻損米幾有萬石淹死運軍除不知名外計陸越等二

十六名口而傳聞近河一帶田廬盡行衝沒芄
芄禾黍未及登場悉爲烏有其男婦人口幸而
未溺者巢棲露處號泣相聞猶且莫必其命父
老皆稱百年以來未嘗見此災也夫天之降災
此時亦大慘矣使運船尙在江淮或可趨避而
業已鱗集壩下衝突何支且備經險遠幸及起
剝升斗皆庾廩中物矣而固委之陽侯也使淋
潦直其春夏猶望秋禾今一歲之計盡在秋矣
辛苦之粒計日可罄盤殮而忽奪之八口嗷嗷

何以卒歲又安所供賦稅哉撫景傷時可悲可懼查得萬曆三十二年雨水爲災

皇上閔然深念免房租蠲煤稅慨發帑金十萬分賑災民至今閭閻交口頌德今茲水患數倍前時不知

陛下宜何如隱惻何如賑施以至用人修政一切改弦庶幾轉災爲祥者於此必有處矣惟是稼政漕儲關臣職掌寔奉職無狀致茲重災流毒軍民贖罪無地爲此除率屬省憂免圍救過外不

敢不據實上聞伏惟

聖明軫念施行臣愚不勝惓切等因萬曆三十五年
七月初九日具題

請賑疏

題爲三輔周瘵已蘓東南倒懸尤切懇祈

聖明推恩並濟以固環衛事頃者靈淋爲虐都城內外民居昏墊臣俯惕人情阽危之狀仰體

皇上警余之衷具疏請賑隨奉

聖旨是這賑濟銀兩着太僕寺照數給發卿與五城御史查勘的實先儘京城及裏八府災荒之處俱劑量輕重一體賑救欽此

仁綸一渙次第炳如臣卽委本部司官會同五城御

史共給過都門災民計銀二萬九千九十餘兩
近復煮粥平糶漸次舉行當此嚴寒歡聲雷動
是都人無居而有居無食而有食皆

皇上再造恩也其剩銀七萬九百餘兩容臣斟酌重
輕分給八府不止

輦轂咸荷更生舉郊圻均霑化日矣然臣竊有請
焉夫燕趙

皇上之几席也所爲內向環衛者近而齊梁則襟帶
要區遠而江比尤

陵園重地此其緩急不在畿輔下也乃今歲自山東
河南以及南直隸之淮鳳徐揚則水旱交乘水
蝗並作波漾數千餘里陸沉幾萬餘家烟火不
聯道殣相望載在各撫臣章奏者真不啻賈誼
之流涕鄭俠之繪圖矣然而非直此也頻年河
患縱橫獨此三地受害爲最烈而數載興工修
築獨此三地出力爲最殫荷畚負薪之衆筋肉
皆糜衝寒冒役之夫骨骸交枕萬苦千辛言之
腸斷此又他省之所無而畿民之所未見者也

以茲予遺復懼大沴何焉夷之太酷而造物者之不仁哉參贊化育道在

皇上則左右斯民恩亦在

皇上臣猶憶往者中州災甚

皇上特發三十萬金遣官往賑至今湛恩汪濊直與
嵩黃並永興言及此想

聖心曷能無戚戚焉此第數十年前事耳况目今

天德益懋 景福彌隆 大聖人舉動必有迥倍往

時者乎伏祈 聖慈穆然深思超然遠覽推一

視之仁爲大賚之舉渙頒大號慨發賑金不拘
多寡令臣分給三處撫臣多方賑濟俾溝中之
瘠一時俱起則繇近及遠胥被堯仁之匝地
而自東自南共祝舜壽之齊天矣等因萬曆
三十五年十二月初七日具題

請發帑賑濟東南災民疏

題爲東南災害異常 聖世方規可踵比例懇

恩遣官發賑以昭 九重德意以救億萬生靈事

臣

惟國家無事則以四海奉一人有事則以一人
勤四海奉之而小共大共何國蔑有而莫繁于
吳楚江浙之民勤之而已饑已溺何時可忘而
莫急于死生存亡之會乃今東南之災何其烈
也江西水旱游臻則以患延數郡告矣湖廣淫
霖肆虐則以麥禾俱無告矣至于三吳兩浙之

患百年未有饑饉流下之慘異地皆然蓋臣每
睹撫按交章士民奔訴言之酸鼻見者寒心卽
議蠲議減議停議折終是引江水以活涸魚而
饑者溺者徙者死者何異奉漏卮而沃焦釜故
臣竊計之與其就民間之物力以調停于民間
機尚緩而有待不若援聖主之舊思以還求
于聖主慈更速而易周則臣以爲賑濟宜先
而內帑宜發也且斯民非他今之賣妻鬻子
嗷嗷待哺之民卽向之殫力輸財啣啣服義之

民也

皇上百世賴之而不一旦援之恐乎億萬收之而不
涓滴極之忍乎居常則享其樂而遇變則不分
其憂恐乎東南財賦甲天下征之則獨厚于他
省東南災沴亦甲天下而賑之則獨薄于他省
恐乎臣猶及見二十二年中州大災該臣條議
科臣楊東明繪圖疏請蒙我

皇上捐金二十餘萬

特遣光祿寺丞鍾化民往賑以至

聖母皇妃親王共出數萬佐之而中州之災卒不爲害豈非一時美談千秋偉烈哉夫

皇上之心堯舜之心也堯舜之心不以彼此異視而皇上之世唐虞之世也唐虞之世豈以今昔殊恩故卽其軫卹中州而其軫卹東南可知卽其留神一省而其留神四省又可知臣願

皇上慨發帑金數十萬端遣廷臣分賑各處以明哲后之隆恩以續熙朝之盛舉以全兆庶之生命以綿萬禩之洪休計無善于此者昔人有言

曰活及千人子孫必封夫活及千人如此而活
及億兆者何如昔唐太宗撥蝗吞之曰汝食民
之穀寧食吾之肺腸夫肺腸猶所不卹而帑藏
又當何如總之浩蕩之恩歸于大造發棠之
請敢憚頻煩惟

臣

目擊時艱將迎

聖意盖有不容已于哀鳴者惟我

皇上一垂察焉等因萬曆三十六年八月二十三日
具題

覆南京條議救災疏

題爲畿輔墊溺已極據實勘報懇乞

聖恩大賜蠲賑以消隱憂以固根本事四川清吏司
按呈奉本部送戶科抄出總理糧儲提督軍務
兼巡撫應天等府地方都察院右僉都御史周
孔教題前事等因奉

聖旨戶部知到欽此欽遵抄出到部送司案查本年
六月內該巡撫應天右僉都御史周孔教題報
應天徽寧池太安廣七府州異常水災緣繇到

部就經遵例咨都察院轉行巡按御史查勘被災分數去後緣按臣物故今撫臣勘明條議前來查得先年題 准災免事例凡遇各處夏秋災傷取勘是實除三分以下不免外全災者免七分九分者免六分八分者免五分七分者免四分六分者免三分五分者免二分四分者免一分俱于存留糧內除豁不許將起運之數一槩混免其衛所屯糧災重者每石折銀三錢輕者折銀三錢伍分通融作數抵放月糧又查屬

曆十五年三月內該刑科左給事中張棟題本部議覆被災八分以上者漕糧不分正改兌每石折銀五錢被災七分以下者仍照議單事例正兌每石折銀七錢改兌六錢俱經題奉

欽依通行欽遵在卷今該前因通查案呈到部看得民者國之根本財者民之生機根本撥則國病生機廢則民病二者相因勢難偏廢臣至愚陋筦樞錢穀陛下加意卹災一應起存錢糧議蠲議折則以問臣上而祭祀之供外而軍

國之需下而廩祿之餼稍有缺乏則以問臣臣一
身耳情逼於倒懸之宜解而算窮于無米之難
炊伎倆都盡計盡無之蓋臣初覆江右之災再
覆浙西蘇松之災今又覆應議六郡之災民其
魚矣假令賈生而在其痛哭當何如者古稱水
患祇曰懷山襄陵而今六郡咸沼祇曰蛇龍居
之而今蛟蛇拔山祇曰九年之蓄水不爲災而
今民如懸罄帑無半鎰興言及此能不耐心用
是仰體

皇上如傷之視其於西郡三輔之地不敢不倍加喚
响亦不敢不極力調停蠲不可則議減減不可
則議折折之不足又覆議緩臣之情可謂苦矣
臣之計可謂窮矣蓋今年之民生既窘明年之
物力必疲今年之蠲折既多明年之度支必匱
此臣之私憂過計不得不凜凜于此也

皇上爲天之子一念好生可以回天儻蒙

渙發德音少捐內帑割十年之朽蠹拯百萬之生

靈將歡聲動地和氣薰天從目前論莫溝壑于

祗席大彰博濟之恩從後來論培樂利爲輪將
坐收好義之報此豈非回天之力而天且爲

皇上用哉臣衰朽已極痰火交攻萬不能爲

皇上再効犬馬唯是極溺救饑不敢坐視謹再覆覈
而少効其欸欸如此除事關禮兵工三部及南
京各衛門者容臣移咨聽其徑自議覆外所據
各項錢糧相應照例開列擬議上 請恭候

命下本部轉行應天撫按一體遵照施行等因萬曆
三十六年十月二十四日具題十一月初四日

奉

聖旨應天等府根本重地災沴異常朕深憫念這獨恤事宜俱依議行今內外帑藏俱苦匱乏賑濟不敷着于前旨給賑浙西鹽課稅銀二項內各撥一半分給應天等六府以昭朕加惠窮民彼此均徧至意欽此

原缺

老稚轉乎溝壑壯者散而四方不亦可哀也哉
此二臣目擊而傷心焉所以交章迭奏涕泣而
陳雖鄭俠之圖不是過而賈誼之哭不足言矣
夫 畿南六府爲

京師保障是咽喉之樞而腹心之關也此地而受
病則何處不病猶人斷其咽喉而傷其腹心尚
有生理也乎故善治病者當于喫緊受病處亟
治之耳往者三十二年北直大水蒙

聖恩慨發同金十萬兩自賑都民而外餘及保定撫

屬三萬兩以賑濟又

允按臣之請發德通二倉米四萬石以平糶三十五年北直又大水復蒙

聖恩發帑金十萬兩自賑都民而外餘及保定撫屬三萬五千兩以賑濟又

允撫臣之請發德通兩倉米各五萬石以平糶一時昏墊之民咸登衽席喁喁焉各得生活以至今日爲蠶輔之衛者皆

皇上所留也今旱魃之虐更毒于商牟冰雹之災尤

憐于巨浸蝗蝻之害反酷於蛟龍室廬蕭條不
成于曩時之坍塌死亡枕籍大倍於往日之漂
沉昔蒙

聖恩發金發粟獲全遺孑之餘今敢不仰體

聖慈請金請粟以解倒懸之厄哉仰祈

皇上俯查往例 亟賜允行毋紆徐從容以重災民

之困可也蓋方病而藥之則病或可起迨於淪
胥死亡而後求三年之艾雖虛扁復起不可得
已至於按臣所議將保河二府落地稅銀免解

一年留爲賑濟并議罷關市河橋之稅

請發內帑之金此尤切中膏肓對症之藥石也更祈
聖明留意 大沛綸音俾咽喚腹心之病渙然以釋
漸而至肩背肘腋之間不遽然俱有起色乎胥
天下而頌

聖天子之大有爲者斷在此舉失臣雖病臣也去臣
也蓋亦有餘榮焉外若蠲免停徵帶徵寬起解
之限雖曰例可援而事易濟不過調濟之餘事
耳臣部當筭勘覆之日按照災傷分數酌議上

請斯亦關治本之良藥哉臣無任激切不勝待
命之至等因萬曆三十七年十月二十五日具題

畿南災傷題催請賑疏

題爲畿南災民愈劇荒政愈遲懇祈

聖慈簡發原疏以保遺黎以固邦本事照得

國家根本獨在 神京 明主湛恩每先首善人

者畿南六府曠災亦云極矣臣于十月二十五
日具題請賑誠見饑民之旦夕莫必未敢旁觀
皇仁之浩蕩無涯豈虞中格乃旬日以來候

旨未下豈其忍視饑荒之困憊而莫之省憂抑亦故
爲歲月之遷延而漠不關念耶夫此被災之民

皆我

皇上赤子也皆密邇輦轂而望澤之最先者也又

皆切近共安危而極爲翼戴者也痼瘼固自乃身痛癢豈容異視且近日相傳以來是何景也鬴粟已空矣炊烟已斷矣甚至咽糠粃而糠粃不充又甚至剥榆柳而榆柳亦盡于是揭家乞食日哀叫于沿門連背流移頻號咷于道路老弱盡爲滯瘠少壯半若死灰况邇者身無寸縷寒及裂膚死亡枕藉曷可勝數憶茲情景不覺

涕洟之橫集矣

皇上寧不測然動念耶夫四方水旱且欲徼破格之恩三輔顛連豈肯靳如天之覆下危而姑置之則非情下急而故緩之則拂望

皇上誠念此嗷嗷待濟之民是何苦楚是何促迫早一日則生全者千萬遲一日則死亡者千萬誠慨然早沛德音以救此千萬之命鴻慈也盡千萬民共祝齊天之壽崇禋也且

明詔下則人心安畿甸安則天下之需次待

愚者亦安杜患于蕭牆塞釁于嚙聚上計也抑何悵而不爲此雖荒政一節臣部尚有未議地方官亦有便宜然煥號未申豈敢擅議伏祈

軫念根本重地 亟簡臣部併按臣諸疏盡

賜批發容臣等遵照施行則片語卽爲

深仁貼危尤易見德所謂本固邦寧仗茲一舉惟皇上亟圖之臣愚無任懇禱惶悚待

命之至等因萬曆三十七年十一月十五日具題

題爲災傷四起請帑停稅疏

題爲省直災傷四起地方蠲恤久稽懇乞

聖明軫念慨然發帑停稅以拯予遺以固邦本事
蓋天生民而立之君民戴君而托之重故言君
者曰盡人物贊化育又曰裁成輔相以左右民
誠謂好風好雨則與民相安一遇災傷流行則
爲之多方賑恤以贊其所不及而相其所不容
已耳在昔堯湯水旱側身修行補之麋饑者姑
不具論卽

國朝嘉靖七年四川陝西湖廣山西等處重災
肅皇帝不聳 特諭起存錢糧盡行蠲免乎迨我
皇上愛民念殷往見一省一直或春災或夏浸率不
難各捐數十萬而分恤之故能保有金甌至于
今日矧今旱潦風雹蝗蝻等災幾遍天下春播
秋收兩無一熟而反泄泄然不一動念耶案查
薊遼總督王象乾順天巡按李光輝長蘆巡鹽
畢懋康各揭稱保河真順廣大六府屬州縣今
春迄夏天道亢暘二麥枯稿五月後漸得甘霖

民計竭力佈種乃禾苗正當暢茂忽爾蝗蝻四
起水電大作茂盛者僅存枝幹秀實者不遺顆
粒一時災出異常萬姓命懸呼吸望蠲望恤急
于星火等因又據江西巡撫銜承芳揭稱南昌
瑞州袁州饒州南康撫州廣信等府屬州縣自
春徂夏霖雨異常二麥初黃已遭腐爛五月二
十一日不等蛟水突發浪湧滔天溺死人民無
算正額錢糧難辦相應亟行勘恤等因又據福
建巡撫陳子貞揭稱建寧邵武延平福州等府

屬州縣于本年五月二十三、四等日各被重大水災，田地盡爲砂礫之場，人民半葬江魚之腹。卽有倖存無田可耕，無粟可食，乞留本省商稅五萬兩，鹽運司本年未解課銀一萬一千三百餘兩，撫按本年贓罰六千兩，以拯災民等因。又據山東巡撫黃克纘揭稱：濟青登萊等府屬州縣風旱傷殘，夏麥蝗蝻食盡，秋禾間有少蝻之處，則又苦潦苦水，電小民嗷嗷待哺，訛言四起，貢賦無出，徑將災重十七州縣漕糧改折以廣

德意等因又據山西撫按巡鹽魏養蒙劉光復
陳于庭揭稱太原潞安等府屬州縣去年三冬
無雪今年春夏二季無雨夏田未收秋禾稍長
微苗不幸天降惡雹將所種田苗瓜果樹葉等
項盡行打毀無存饑民携老扶幼千百成羣或
託名赴食潛投房中或嘯聚山澤橫肆搶掠或
三五合夥邀截道路乞留本省四萬兩稅銀以
起溝中之瘠并條議救荒八款如發京運緩舊
逋免積穀停清勾留襍銀准援納獎好義嚴舉

勅等因又據宣大撫按連標霍鵬吳亮揭稱五月以來至于七月旱魃爲虐禾稼就稿間有吐秀者又多不實乃至八月復被霜雹疊降病禾遺穗一掃殆盡饑民析骸以爨而姦盜弄戈可虞况黠虜窺伺易變募軍獷悍難馴恐寇盜之事不在西羌而在北虜等因又據四川撫按喬璧星朱萬春揭稱成都保寧順慶敘州重慶馬湖夔州嘉眉邛雅瀘瀘等府州縣夏秋以來環山皆烈四野俱焦一切牛畜俱以無水渴死人

民拋鄉離井分散此離舉目皆失澤之鴻滿眼
盡溝渠之鬼懇發 內帑盡停蜀稅將本年見
徵一半爲今冬賑救之需仍將來歲全稅採木
四萬兩并留本處濟此青黃等因又據河南撫
按沈季文曾用升揭稱懷衛彰河汝州以及開
南之間千里如焚四望皆赤所在禾苗枯槁井
里蕭條人心惶惶挈妻携子就食他方若非破
格拯恤其不爲溝中瘠潢池梗者幾希并議緩
征改折等因又據鄖陽巡撫黃紀賢揭稱撫屬

湖廣鄖陽荊州二府州縣河南南陽府屬州縣
陝西漢中西安府州縣自春至夏旱魃爲災迨
至于秋炎氣愈熾終歲之田禾盡稿百姓之俯
仰何資目擊時艱殊切隱憂等因又據陝西巡
撫于若瀛稱全陝春夏旣苦霪雨百穀鮮收
夏秋又苦大旱三農失望兼以火光落地山崩
川竭乞急拯救等因又據貴州巡按張爾基報
稱滇中烈風大作走石揚沙白氣亘天經時不
散稍穀不登百姓嗷嗷等因中間情詞雖各不

原缺

不停之停稅監卽留地方無所事事是不可不
亟撤以安人心者也又况山西稅監張忠亦曾
因災具奏自願撤回此何等時而可吝弗予耶
天所弗予而君予之民卽憾天而不憾

君且共籲天以長爲君若天爲政之缺失而示罰

于民君又不保全吾民以答天譴竊恐天意
人心從此兩絕而國脉從之非臣子所忍言
也之兩者臣部屢請而屢不得諸臣交

請而亦不得今又何苦以

皇上所不樂聞者自甘激聒之罪但救荒急務計無復之不得不補牘以進伏乞

皇上簡發地方諸臣報災各疏更望

大發慈悲廣捐 內帑停必不可徵之稅務撤必不可留之內璫其稅銀之已徵未解者

准留各地方以爲賑救之需庶災民之倒懸少蘇而國運之靈長可保矣臣病臣亦鄙臣也無益于國而有訾于時留之一日則滋一日之譏彈寬之一分則存一分之生息

皇上何苦不以憐臣體臣而令四十年狗馬之役卒
以供言臣之唇吻乎爲此踧踖不避

斧鉞伏惟

皇上并賜裁察等因萬曆三十七年十一月二十八日具題

覆北直福建督撫按題請蠲賑疏

題爲旱蝗特甚水雹異常百穀無成民生益蹙懇
乞 速賜查勘破格蠲賑以安孑遺以固根本
事福建清吏司案呈奉本部送戶科抄出巡按
直隸監察御史李光輝題前事奉

聖旨今歲各處奏報水旱災傷人民困苦朕深爲憫
惻畿輔重地又復如此益軫朕懷着該部通行看
議作何蠲賑分別來說不得遲緩欽此欽遵抄出
到部送司卷查本年九月內先該順天巡按李

光輝時因保定撫臣未任代爲奏報保河二府屬州縣衛所各被重大旱災乞行查勘酌量蠲賑等因題揭到部本年十月內又該薊遼總督王象乾時以保定撫臣未任真定按臣未差因題爲畿輔重地蝗旱異常等事代爲奏報真順廣大四府屬州縣地方遭罹旱災并蝗蝻水雹相繼爲害乞行查勘的確將應徵稅糧蠲免破格賑恤并乞將李家道口河稅及各州縣落地稅銀 特加豁免等因題咨到部本年八月內

先該福建巡按陳子貞揭爲重大水災人民流
散等事奏報建寧邵武延平福州四府建安甌
寧等十五縣各被重大水災人民涂溺田廬衝
毀議將該省本年商稅銀五萬兩監課一萬一
千三百一十二兩撫按贓罰六千兩乞晉本省
以救災民乞行查勘并將舊逋新徵破格蠲恤
等因題揭到部俱經先後移咨都察院轉行順
天真定福建各巡按御史勘報去後續該順天
巡按李光輝揭爲報災 俞旨久羈蠲賑勢難

延緩等事題催保河二府災傷原疏因查三十二年水災發帑金十萬賑濟事例議請發帑金數萬兩并議將保河二府落地稅銀免解一年留爲賑濟其錢糧蠲免停緩等項乞

勅議處等因又該長蘆巡鹽畢懋康捐爲畿南荒旱異常饑民流亡可慮等事因行部至真定順德等處見赤地千里流離載道撫按並缺報災踰期乃極狀真順廣大四府疊罹旱魃蝗蝻之災欲寬起解之限發賑濟之金罷關市河橋之稅

并乞部覆破格蠲賑等因各疏摺到部送司內
除督撫按臣所議稅糧等銀蠲折停緩等項悉
聽按臣勘奏回日酌量分數議覆外今據李舉
二御史所議賑恤事宜比照三十二年發金
發粟事例擬議上請未蒙

俞旨旋復催疏亦未奉有簡發今遵前

旨通行看議相應分別具題通查案呈到部看得堯
湯之世未嘗無水旱之災而堯湯之民未嘗罹
水旱之苦則以拯救有方而痼瘼自切故大君

不患歲時之不登而患行仁之無術耳恭惟
皇上覽諸臣之奏報擊各處之災傷惻然有槩于中
而 渙汗特頒曰深爲憫惻曰益軫朕懷蓋灼
見四方之艱難而洞燭畿南之困苦矣曰該部
通行看議曰不得遲緩蓋深念惠澤之當先而
尤慮後時之無及矣大哉 王言臣等敢不奉
揚而自其遲緩哉謹按天下之旱災非一而畿
南六府爲甚天下之水災非一而閩中四府爲
甚或苦於赤地之如焚或苦於望洋之無際或

苦於蟲賊之厚集或苦於水雹之交加斯時也
輦輦小民居無爲家養無爲食展轉流亡枕籍
溝壑所不卽奄然以逝而猶或淒然以生者特
未盡之子遺耳嗟乎此遺軀命且不能保寧復
別有生理而勉供此無藝之征求哉况稅之毒
不早而焚不水而溺其苦最久而民望稅之撤
甚于拯溺甚于救焚其情更殷誠于此時而停
之則仁政所敷久旱之甘霖也仁恩所暨
重陰之霽日也寬一分可以得千萬分之濟蘓

一邑可以活千萬人之生其于平時固切銜恩
至於今日尤易見德也且畿南關係重地閩省
僻居海陬萬一遲留禍且叵測此諸臣膏肓之
劑而臣愚肝膈之談

皇上誠不得以氣數諉之而空言慰之矣伏乞

聖慈俯念災黎朝不謀夕亟將督臣所議免李家道
口河稅并真順廣大四府各州縣落地稅與撫
臣所議留該省本年商稅五萬兩按臣所議留
保河二府落地稅免解一年及鹺臣所議罷開

市河橋之稅發 內帑之金數事一一
勅下施行以地方自有之膏脂還而爲地方普濟之
盛舉則不必借問金而發倉粟行見起死回生
而溝瘠者衽席流離者安堵矣至于省直稅糧
等銀蠲折停緩等項臣部自有災傷定例當俟
按臣勘回之日酌量分數另行議覆請自
聖裁等因萬曆三十七年十一月二十八日具題

流移滿路請發帑罷稅跡

題爲災民流移滿路 國勢机捏可虞懇乞

聖明亟發 帑金以解近憂并罷稅務以蘇久困事

竊惟天災流行何代蔑有然未有連年遍地如
今日域中之甚者水不已而旱旱不已而蝗蝗
不已而雹普天率土層見迭出近且旱魃肆虐
亢陽彌驕自冬及春自春徂夏沛然絕望囂然
喪生二麥之苞生盡枯百穀之嘉種未播卽撫
臣奉

命虔禱而累年不懌之天心豈區區臣工所能感格
以故祈禳雖久雨意未萌山川纔一興雲風霾
旋卽蔽日遠之吳楚江浙閩越之墟不及具論
近而秦晉趙魏齊魯環此數省幾及萬里四望
盡赤寸草不芽蓋處處方方皆河伯掉臂之地
祝融行在之所矣窮民向何乞化流亾於何逃
生近聞之轍環者販負者同口一詞皆謂數省
之民扶老携幼盡望京畿就食夫京畿何地咫尺
卽近宸居今歲何年饑饉不戒外境卽區

區大倉金錢各庾漕粟所積幾何而能堪此數
省窮民枵腹而望聚族而謀哉相安無事不能
當其補助也洵洵有心不能當其睥睨也今邊
聲蜂起饑卒狼奔萬一數萬流離內迫於饑寒
外促於觀望揭潢池之竿樹奸民之幟則腹心
肘腋之地危急漂搖之秋能當此震驚而無患
哉臣愚以爲此時宜莫如以賑之之道散之賑
之不必在京師也散之不必用刑驅也但今太
倉老庫無可那處伏惟

皇上亟沛堯仁大開周賚發帑數十萬分給山西河南山東北直隸四省撫臣令之設法招徠多方賑濟務俾民沾實惠勿令吏恣侵漁庶幾來者去聚者還或可什一二相全乎但

皇上一聞請帑之名便輒逆耳不欲聽不知此積非理中之物額內之財乃數年來剗山空海剝髓吸膏奪天地民物之精英而強以貯之撲滿者也既以傷殘天人之生以釀成今日之數則又烏得不亟散天人之積以解救今日之厄況今

日國計百無措手而各省直正額又毫不可
蠲臣前疏所謂遺郡遺邑遺鄉之處各邑各郡
素封之民尚欲其舊逋新征勉副

國家燃眉之急乃

皇上爲民天地爲人父母顧恐坐擁大盈之藏目擊
流離之慘而不爲之一關痛癢一念死生則又
何以倡急公之民而收終事之效哉以救窮民
倒懸之命者鼓富民好義之心以數十萬朽蠹
之子者來數百萬惟正之供則散之非所以爲

損而予之正所以爲催

皇上何憚而不爲此試虛心以研則內帑之必不可
復愴也不俟臣辭之畢矣雖然以帑濟民其財
有限以民濟民其利無窮今日審時度勢宜無
如盡罷稅務一節蓋天行之災已遍天下稅政
之害又逾十年

皇上試想十數年來稅使之額派進矣方物進矣孝
順進矣而各地方之關稅契鎗庫藏鹽筴拖欠
贖緩如舊足額否十數年來

大內之黃白積矣珠玉積矣異產積矣而各倉庾之
芻粟漕糧邊需內供如舊足額否在內入者不
能細覈其數在外損者猶可盡遡其原則

皇上十數年來與遠近百姓中外臣工較量錙銖爭
執短長者其中得失孰多惟是億萬蒼赤起無
窮怨咨囹圄繫臣結無窮冤抑千秋萬古損無
窮令名

皇天后土貽無窮譴怒

皇上試將前後反覆合觀則又何惜而不慨然罷此

以與災民更始哉亟發

內帑於四省以消腹心之變盡罷稅務於天下以
安四方之心前

聖諭所謂自有停止之日者今以爲晚過此恐無及
矣不然以多藏厚亡之理加以饑寒切身之時
慈父不能保其子君安能以有其民急不擇音
挺而走險勢所必至理有固然

皇上大孝光天至德繩祖忭令

聖母萬壽無疆之日日升川至之年見此悖入悖出

之景哉臣愚病卧經年危在旦夕所有耿耿
死不瞑故敢忘其顛迷而哀鳴如此惟我

皇上察其意而矜原之

慨賜施行病臣不勝大幸其於

社稷生民兩有攸賴矣等因萬曆三十八年閏三月

二十四日具題

繳 欽恤聖諭疏

題爲欽奉

聖諭事萬曆三十二年七月十三日該司禮監太監
田義等於文華門傳奉

聖諭戶工二部天雨連綿京城冊壞房屋數多壓傷
人民甚衆朕聞心甚惻然便着太僕寺給發銀十
萬兩交與該部并該科及五城御史會同查勘分
明每房一間欽賞銀五錢以資修理賑濟及醫藥
津途之費務先儘貧難下戶仍不許官吏侵冒必

令沾受實惠有舊例該舉行的着題來行欽此所
有札內事理容臣卽便會同工部及科道諸臣
欽遵施行外原奉

聖諭一道相應進繳爲此謹具題

知

繳 欽恤聖諭疏

題爲欽奉 聖諭事本月二十一日該司禮監太

監田義等于 文華門傳奉

聖諭諭戶部朕思雨水連綿京師米價日貴便着于通州倉糧暫借十萬石運赴京倉支放該月折色米糧候新糧到日卽與補還其五城房號銀兩除舊例免徵外再着免徵一箇月以昭朝廷權宜救災德意欽此臣謹恭捧到部開讀遵行外竊伏私念

皇上真天縱仁主也念民居之蕩折則慨發罔銀資
給修理念民食之惟艱則移粟通倉免徵房號
一時浩蕩之恩頓使被菑窮民旣棲託之有地
復含哺之可資懽呼舞祝何啻更生然此則釜
爨而上者也釜爨而下非火不炊非煤不火孰
非得失生死之關此猶京畿而內者也畿京而
外曾天王土率土王民孰無思見德化之念
皇上試繇小民朝夕之謀備想其饗殮之計又試以
目前內地之景遐想夫四方之情所爲推恩布

德出民于水火而置之衽席者當不俟終日次第施行而臣亦立見太平之世共爲都俞之展也幸甚幸甚再照

聖諭內借運通糧支放該月折色及查放糧舊例每年止四月十月放及折色其餘月分原自本色今四月已過十月尚遲除十萬通糧臣卽遵

旨運赴京師至于放期或仍照舊例容臣催贖上策放給惟復

聖明更有裁酌 勅下施行所有原奉

聖諭合理 進繳謹題請

上因萬曆三十二年七月二十一日具題二十六
日奉

聖旨知道了着照舊例仍催上緊放給欽此

繳 欽恤聖諭疏

題爲欽奉 聖諭事本月二十五日該文書房官

金忠於 文華門傳奉

聖諭諭戶部朕憫西山被災窪戶著比京城下戶壹
體給賞卽于見發太僕寺銀十萬兩內通融分與
還著該部科及順天府官會同給散務令各沾實
惠水占窪口免徵課銀三箇月欽此臣盥手開讀
不勝感泣夫以旬日之間臣部三接

御札無非軫念

輦轂小民無食無居爲之計安計飽故此一室戶也
在昔則徵之在今則賑之蠲之仰見

皇上愛養元元至意未嘗頃刻少釋於懷特無以觸
之若隱於無爾假令繇輦轂以及郊圻繇郊
圻以及四國所欲者與聚所惡者勿施將見在
在更生人人頌德臣等亦且優游清署承流
宣化之不暇又何用喋喋而佔佔爲也臣無任
翹首激切祈望之至所有札內事理容臣卽
便會同科府諸臣欽遵施行外原奉

聖諭一道相應

進繳萬曆三十二年七月二十五日具題

奏繳 聖諭疏

奏爲欽奉 聖諭事萬曆三十八年四月二十八日辰時該司禮監太監成敬等于 會極門傳奉 聖諭諭戶部今歲北直隸山東山西河南四川各處災傷人民窮饑朕深懷惻念恭承聖母慈諭發銀十萬兩賑濟朕將御前積餘及新到浙直稅銀共五萬兩又諭令中官等各出費剩不等一併給發爾部着酌量各處災傷輕重分派多寡選差廉慎官賁解各處會同該撫按官

商議賑濟務使分散得法實惠及民以稱

聖母與朕憫恤元元至意其 畿輔災民及各處流

來饑民爾部還發京倉及附近倉米三十萬石
一體給賑各省撫按等官仍多方計畫便宜措
置共拯民窮所有罪贖銀兩盡行買穀濟荒不
得那移他用四川福建水旱特甚也准留三十
八年春夏二季稅銀給賑朝廷于小民體念周
至爲百姓的都當安分守已挨度箇年如有乘
機搶奪聚衆非爲便是亂民法所不宥着各地

方官禁緝懲治毋致蔓延故諭欽此欽遵臣等
僅卧床褥未及詣闕叩領謹揣差本部司務
孫克恕恭捧到寓設立香案扶病拜領訖除將
賑濟銀米酌量災傷重輕另本具題賞發災傷
省直移文撫按官遵照分別賑濟及戢暴安民
等事悉爲着實舉行外所有原奉

聖諭一道理合隨本進繳謹具題

知等因萬曆三十八年四月二十八日具奏